

明史稿

明史稿

明史稿

列傳第九十一

光祿大夫

經筵講官明史總裁戶部尚書加七級

臣

王鴻緒奉

敕編撰

俞大猷

盧鏜湯克寬

戚繼光

朱

先

劉

顯

郭

成

李

錫

黃應甲尹鳳

張元勳

俞大猷字志輔晉江人少好讀書受易於王宣林福得蔡清

之傳又聞趙本學以易推衍兵家奇正虛實之權復從受其

業嘗謂兵法之數起五猶一人之身有五體雖將百萬可使

合為一人也已又從李良欽學劒家貧屢空意嘗豁如父歿

棄諸生嗣世職百戶舉嘉靖十四年武會試除千戶守禦金

門軍民鬪訟難治大猷導以禮讓訟為衰止海寇頻發上書

監司論其事監司怒曰小校安得上書杖之奪其職尚書毛伯溫征安南復上書陳方略請從軍伯溫奇之會兵罷不果用二十一年俺荅大入山西詔天下舉武勇士大猷詣巡按御史自薦御史上其名兵部會伯溫爲尚書送之宣大總督翟鵬所召見論兵事大猷屢折鵬鵬謝曰吾不當以武人待子下堂禮之驚一軍然亦不能用大猷辭歸伯溫用爲汀漳守備涖武平作讀易軒與諸生爲文會而日教武士擊劒連破海賊康老俘斬三百餘人擢署都指揮僉事僉書廣東都司新興恩平峒賊譚元清等屢叛總督歐陽必進以屬大猷乃令良民自爲守而親率數人徧詣賊峒曉以禍福且教之擊劒賊駭服有蘇青蛇者力格猛虎大猷給斬之賊益驚乃

詣何老猶峒令歸民侵田而招降渠魁數輩二邑以寧二十
八年朱統巡視福建薦爲備倭都指揮會安南入寇必進奏
留之先是安南都統使莫福海卒子宏瀼幼其大臣阮敬謀
立其壻莫敬典范子儀謀立其黨莫正中互讐殺正中敗擊
百餘人來歸子儀收殘卒遁海東至是妄言宏瀼死迎正中
歸立剽掠欽廉等州嶺海騷動必進檄大猷討之馳至廉州
賊攻城方急大猷以舟師未集遣數騎諭降且聲言大兵至
賊不測果解去無何舟師至設伏冠頭嶺賊犯欽州大猷遮
奪其舟追戰數日生擒子儀弟子流斬首千二百級窮追至
海東雲屯檄宏瀼殺子儀函首來獻事平嚴嵩抑其功不敘
但賚銀五十兩而已是年瓊州五指山黎那燕構感恩昌化

諸黎共反必進復檄大猷討而朝議設參將於崖州卽以大猷任之乃會廣西副將沈希儀諸軍擒斬賊五千三百有奇招降者三千七百大猷言於必進曰黎亦人也率數年一反一征豈上天生人意宜建城設市用漢法雜治之必進納其言大猷乃單騎入峒與黎定要約海南遂安三十一年倭賊大擾浙東詔移大猷臺台諸郡參將會賊破寧波昌國衛大猷擊却之復攻臨山衛轉掠至松陽知縣羅拱辰力禦賊浮海走大猷邀擊斬獲多竟坐失事停俸未幾逐賊海中焚其船五十餘予俸如故越二年賊據寧波普陀大猷將士攻之半登賊突出殺武舉火斌等三百人坐戴罪辦賊俄敗賊吳淞所詔除前罪仍資銀幣賊自健跳所入掠大猷

連戰破之旋代湯克寬爲蘇松副總兵所將卒不三百人而
所徵諸道兵未集賊犯金山大猷戰失利時倭屯松江柘林
者盈二萬總督張經趣之戰大猷固不可及永順保靖兵稍
至乃從經大破賊於王江涇功爲趙文華胡宗憲所攘不敘
坐金山失律謫充爲事官柘林倭雖敗而新倭三十餘艘突
青村所與南沙小烏口浪港諸賊合犯蘇州陸涇壩直抵婁
門敗南京都督周於德兵賊復分爲二北掠潯墅南掠橫塘
延蔓常熟江陰無錫之境出入太湖大猷偕副使任環大敗
賊陸涇壩焚舟三十餘又遮擊其自三丈浦出海者沉七艘
賊乃退泊三板沙頃之他倭犯吳江大猷及環又邀破之鶯
脰湖賊走嘉興三板沙賊掠民舟將遁大猷追擊於馬蹟山

擒其魁金涇許浦白茅港賊俱出海大猷追及於茶山焚五
舟賊走保馬蹟山三板沙將士復追及壞其三舟江陰蔡港
倭亦去官兵分擊於馬蹟馬圖寶山值颶風作賊舟多覆柘
林倭亦爲官兵所擊沉二十餘舟餘賊退登陸已復泛舟出
海大猷及僉事董邦政分擊獲九舟而賊又遭風壞三舟餘
三百人登岸走據華亭陶宅鎮屢敗趙文華等大軍夜屯周
浦永定寺官兵四集進圍之而柘林失風賊九舟巢於川沙
窪糾合至四十餘艘勢猶未已巡撫曹邦輔劾大猷縱賊帝
怒奪其世廕責取死罪招立功自贖時周浦賊圍急乘夜東
北奔爲游擊曹克新所邀斬首百三十遂與川沙窪賊合諸
軍日夜擊賊焚巢出海大猷偕副使王崇古入洋追之及於

老鸛背焚巨艦八斬獲無算餘賊奔上海浦東初以倭患亟特命都督劉遠爲浙江總兵官兼轄蘇松諸郡數月無所爲廷臣爭言大猷才三十五年三月遂罷遠以大猷代賊犯西庵沈莊及清水窪大猷偕邦政擊敗之賊走陶山詔還世廕賊自黃浦遁出海大猷追敗之其年冬以與平徐海功加都督僉事海旣平浙西倭悉靖獨寧波舟山倭負險官兵環守不能克是時土兵狼兵悉已遣歸而川貴所調麻寮大刺鎮溪桑植兵六千始至大猷乘大雪四面攻之賊死戰殺土官一人諸軍益競進焚其棚賊多死其逸出者復殪賊盡平加大猷署都督同知明年胡宗憲方圖汪直用盧鏜言將與通市大猷力爭不可及直誘入下吏其黨毛海峰等遂據舟山

阻岑港自守大猷環攻之時小勝然苦仰攻將士先登多死
新倭又大至朝廷趣宗憲甚急宗憲謾爲大言以對廷臣競
詆宗憲并劾大猷乃奪大猷及參將戚繼光職期一月內平
賊大猷等懼攻益力賊益死守三十七年七月乃自岑港移
柯梅造船成泛海去大猷等橫擊之沈其一舟餘賊遂揚帆
而南流劫閩廣大猷先後殺倭四五千賊幾平而官軍圍賊
已一年宗憲亦利其去陰縱之不督諸將邀擊比爲御史李
瑚所劾則委罪大猷縱賊以自解帝怒逮繫詔獄再奪世廕
陸炳與大猷善密以已資投嚴世蕃解其獄令立功塞上大
同巡撫李文進習其才與籌軍事乃造獨輪車拒敵馬嘗以
車百輛步騎三千大挫敵安銀堡文進上其制於朝遂置兵

車營京營有兵車自此始也文進將襲板升謀之大猷果大獲詔還世廕寇掠廣武大猷拒却之先論平汪直功許除罪錄用及是鎮筭有警川湖總督黃光昇薦大猷卽用爲鎮筭參將廣東饒平賊張璉數攻陷城邑積年不能平四十年七月詔移大猷南贛合閩廣兵討之時宗憲兼制江西知璉遠出檄大猷急擊大猷謂宜以潛師搗其巢攻其必救奈何以數萬衆從一夫浪走哉乃疾引萬五千人登柏嵩嶺俯瞰賊巢璉果還救大猷連破之斬首千二百餘級賊懼不出用間誘璉出戰從陣後執之并執賊魁蕭雪峰廣人攘其功大猷不與較散餘黨二萬不戮一人擢副總兵協守南贛汀漳惠潮諸郡遂乘勝征程鄉盜走梁寧擒徐東洲林朝曦者獨約

黃積山大舉官軍攻斬積山朝曦遁後亦爲徐甫宰所滅大猷尋擢福建總兵官與戚繼光復興化城共破海倭詳繼光傳繼光先登受上賞大猷但賚銀幣四十二年十月徙鎮南贛明年改廣東潮州倭二萬與大盜吳平相犄角而諸峒藍松三伍端溫七葉丹樓輩日掠惠潮間閩則程紹祿亂延平梁道輝擾汀州大猷以威名懾羣盜單騎入紹祿營督使歸峒因令驅道輝歸兩人卒爲他將所滅惠州參將謝敕與伍端溫七戰失利以俞家軍至恐之端乃驅諸酋以歸無何大猷果至七被擒端自縛乞殺倭自効大猷使先驅官軍繼之圍倭鄒塘一日夜克三巢焚斬四百有奇又大破之海豐倭悉奔崎沙甲子諸澳奪漁舟入海舟多沒於風脫者二千餘

人還保海豐金錫都大猷圍之兩月賊食盡欲走副將湯克寬設伏邀之手斬其梟將三人參將王詔等繼至賊遂大潰乃移師潮州以次降藍松三葉丹樓遂使招降吳平居之梅嶺平未幾復叛造戰艦數百聚衆萬餘築三城守之行劫濱海諸郡縣福建總兵官戚繼光襲平平遁保南澳四十四年秋入犯福建把總朱璣等戰沒於海中大猷將水兵繼光將陸兵夾擊平南澳大破之平僅以身免奔據饒平鳳凰山繼光留南澳大猷部將湯克寬李超等躡賊後連戰不利平遂掠民舟出海閩廣巡按御史交章論之大猷坐奪職平卒爲克寬所追擊遠遁以免不敢入犯矣河源翁源賊李亞元等猖獗總督吳桂芳留大猷討之徵兵十萬分五哨進大猷使

間攜賊黨而親搗其巢生擒亞元俘斬一萬四百奪還男婦
八萬餘人乃還大猷職以爲廣西總兵官故事總兵兩廣者
一勛臣爲之與總督同鎮梧州帝用給事中歐陽一敬議兩
廣各置大帥罷勛臣乃召恭順侯吳繼爵還京以大猷代予
平蠻將軍印而以劉顯鎮廣東廣西之有總兵官自大猷始
也伍端死其黨王世橋復叛劫執同知郭文通大猷連敗之
其部下執以獻進署都督同知海賊曾一本者吳平黨也旣
降復叛突犯雷州敗參將魏宗瀚王如澄繆印執印及把總
俞尚志以去已歸尚志乞撫於克寬令居潮陽下澮地民不
堪其擾鼓譟圍揭陽克寬令一本勦屠之已而一本亦叛執
澄海知縣敗官軍守備李茂材中礮死詔大猷暫督廣東兵

協討隆慶二年一本犯廣州尋犯福建大猷合郭成李錫軍擒滅之錄功進右都督廣西古田獐黃朝猛韋銀豹等嘉靖末嘗再劫會城庫殺參將黎民衷巡撫殷正茂徵兵十四萬屬大猷討之分七道進連破數十巢賊保潮水巢極巔攻十餘日未下大猷佯分兵擊馬浪賊而密令參將王世科乘雨夜登山設伏黎明礮發賊大驚諸軍攀援上賊盡死馬浪諸巢相繼下斬獲八千四百有奇擒朝猛銀豹百年積寇盡除進世廕爲指揮僉事大猷爲將廉馭下有恩數建大功威名震南服而巡按李良臣劾其奸貪兵部力持之詔還籍候調起南京右府僉書未任以都督僉事爲福建總兵官萬曆元年秋海寇突間峽澳坐失利奪職復以署都督僉事起後府

僉書領車營訓練三疏乞歸卒贈左都督諡武襄大猷負奇節以古賢豪自期其用兵先計後戰不貪近功忠誠許國老而彌篤所在有大勛武平崖州饒平皆爲祠祀譚綸嘗與書曰節制精明公不如綸信賞必罰公不如戚精悍馳騁公不如劉然此皆小知而公則堪大受戚謂戚繼光劉謂劉顯也子咨臯福建總兵官盧鏜汝寧衛人嘉靖時由世廕歷福建都指揮僉事爲都御史朱統所任統自殺鏜亦論死尋赦免以故官備倭福建遷都指揮擊賊嘉興敗責戴罪尋擢參將分守浙東濱海諸郡與副將大猷大破賊王江涇旋督保靖土兵及蜀將陳正元兵擊賊張莊焚其壘追擊之後港爲賊所敗賊出沒台州外海都指揮王沛敗之大陳山賊登山官

軍焚其舟鏜會勦擒其酋林碧川等餘倭盡滅別賊掠諸縣
指揮閔溶等敗死鏜奪職戴罪旋以薦擢協守江浙副總兵
賊陷仙居趨台州鏜破之彭溪乃與胡宗憲共謀滅徐海宗
憲招汪直鏜亦說日本使善妙令擒直直與日本貳卒伏誅
倭犯江北鏜馳援破之又敗北洋倭二十餘艘賊斂舟三沙
復流劫江北巡撫李遂劾鏜縱賊鏜已擢都督僉事爲江南
浙江總兵官奪職視事以通政唐順之薦復職如初尋以誅
汪直功進都督同知倭復犯浙東水陸十餘戰斬首千四百
有奇總督宗憲以蕩平聞鏜復增俸資金鏜擢用由宗憲宗
憲敗給事中丘橈劾鏜八罪逮治免歸鏜有將略倭難初興
諸將悉望風潰敗獨鏜與湯克寬敢戰名亞俞戚云克寬邵